

SLUŽBENI GLASNIK NOGOMETNOG SAVEZA  
FEDERACIJE BOSNE I HERCEGOVINE

„NOGOMET U FEDERACIJI BiH“

# **S T A T U T**

**NOGOMETNOG SAVEZA FEDERACIJE  
BOSNE I HERCEGOVINE**

**Sarajevo, 30.11.2011.g. – vanredni broj**

## S A D R Ž A J

- I - DEFINICIJA TERMINA**
- II - OPĆE ODREDBE**
  - Pravni status
  - Član 1.
  - Član 2.
- III - NAZIV, SJEDIŠTE I OBILJEŽJA**
  - Član 3.
  - Pravni subjektivitet, jezici i obaveze
  - Član 4.
  - Neutralnost i nediskriminacija
  - Član 5.
  - Pravila igre
  - Član 6.
  - Ciljevi i zadaci
  - Član 7.
- IV - ČLANSTVO**
  - Članovi Saveza
  - Član 8.
  - Prijem u članstvo
  - Član 9.
  - Zahtjev i procedura za prijem u članstvo
  - Član 10.
  - Prava članova
  - Član 11.
  - Obaveze članova
  - Član 12.
  - Istupanje i prestanak članstva, raspuštanje asocijacije člana, gubitak članskog statusa
  - Član 13.
- V - POČASNI PREDSJEDNIK I POČASNI ČLANOVI**
  - Član 14.
- VI - ORGANIZACIJA**
  - Organi, tijela i nezavisnost
  - Član 15.
  - Uslovi za status člana organa ili tijela NS FBiH
  - Član 16.
- VII - SKUPŠTINA**
  - Član 17.
  - Članovi Skupštine
  - Član 18.
  - Član 19.
  - Delegati na Skupštini
  - Član 20.
  - Kvorum prisustva Skupštini
  - Član 21.
  - Nadležnost Skupštine
  - Član 22.

Sazivanje, predlaganje članova, kandidature  
Član 23.  
Mandat predsjednika NS FBiH u IO NS/FS BiH  
Član 24.  
Vanredna Skupština  
Član 25.  
Rukovođenje Skupštinom  
Član 26.  
Izbori i glasanje  
Član 27.  
Donošenje odluka  
Član 28.  
Zapisnik  
Član 29.

#### **VIII - IZVRŠNI ODBOR**

Struktura, sastav  
Član 30.  
Kandidature, mandat i zamjena  
Član 31.  
Nadležnost Izvršnog odbora  
Član 32.  
Kalendar sjednica, dnevni red  
Član 33.  
Kvorum  
Član 34.  
Donošenje odluka, suspenzija članova IO i pravnih tijela, suspenzija i isključenje članova komisija  
Član 35.  
Komitet za hitnost NS FBiH  
Član 36.  
Nadležnost i odlučivanje  
Član 37.  
Predsjednik NS FBiH  
Član 38.  
Mandat predsjednika i dopredsjednika  
Član 39.  
Razrješenje pojedinca ili tijela  
Član 40.

#### **IX - PRAVNA TIJELA**

Član 41.  
Disciplinska komisija  
Član 42.  
Apelaciona komisija  
Član 43.  
Tužioc  
Član 44.

#### **X - KOMISIJE**

Član 45.  
Struktura komisije  
Član 46.  
Sjednice, odluke i druge odredbe  
Član 47.

**XI - SEKRETARIJAT (STRUČNA SLUŽBA SAVEZA)**

Član 48.

Član 49.

Član 50.

Generalni sekretar

Član 51.

**XII - RAČUNOVODSTVO**

Fiskalna godina, budžet

Član 52.

Revizija računovodstva

Član 53.

**XIII - FINANSIRANJE SAVEZA**

Član 54.

Član 55.

**XIV – TV I MARKETINŠKA PRAVA**

Televizijski i radio prenos

Član 56.

**XV - TAKMIČENJA**

Takmičenja na nivou FBiH

Član 57.

Član 58.

Član 59.

Pravila takmičenja

Član 60.

Zabrana udruživanja ili saveza

Član 61.

**XVI - DISCIPLINSKA PRAVILA**

Član 62.

Disciplinske mjere

Član 63.

Član 64.

**XVII - SPOROVI**

**Nezavisni i nepristrasni arbitražni tribunal- CAS**

Član 65.

Nadležnost

Član 66.

**XVIII –ZAVRŠNE ODREDBE**

Važeći zakoni i teritorijalna nadležnost

Član 67.

Materija koja nije obuhvaćena Statutom

Član 68.

Raspuštanje Saveza

Član 69.

Primjena

Član 70.

Član 71.

Obaveza prilagođavanja sadašnjih statuta

Član 72.

Broj: 695/11  
Sarajevo: 30.11.2011.

Na osnovu Zakona o udruženjima/udrugama i fondacijama Federacije BiH (Službene novine Federacije Bosne i Hercegovine broj 45/02), člana 76. stav 1. Statuta Nogometnog/Fudbalskog saveza Bosne i Hercegovine, Skupština Nogometnog saveza Federacije Bosne i Hercegovine na sjednici održanoj dana 30.11.2011. godine u Sarajevu usvojila je

## **S T A T U T**

### **NOGOMETNOG SAVEZA**

### **FEDERACIJE BOSNE I HERCEGOVINE**

#### **I DEFINICIJA TERMINA**

- FIFA: Federation Internationale de Football Association  
(Međunarodna nogometna organizacija)
- UEFA: Unison udes Associatons Europeennes de football  
(Evropska nogometna unija)
- IFAB: International Footbal Association Board  
(Međunarodni nogometni odbor koji donosi Pravila igre)
- NS/FS BiH: Nogometni/Fudbalski savez Bosne i Hercegovine
- SAVEZ: Nogometni savez Federacije Bosne i Hercegovine koji se sastoji od deset kantonalnih/županijskih nogometnih saveza
- ASOCIJACIJE:  
(KANTONALNI/ŽUPANIJSKI NOGOMETNI SAVEZI):  
Deset kantonalnih/županijskih nogometnih saveza organiziranih kao nogometne organizacije definisane u skladu s pravnom strukturom Bosne i Hercegovine i Federacije BiH i službeno učlanjene u Savez. Moguće je da postoje udruženja klubova ili pojedinaca (treneri, sudije i dr.)
- DUŽNOSNIK: Svaki član komiteta ili komisije i pojedinci kao što su sudije, pomoćne sudije, treneri i drugi pojedinci odgovorni za tehnička, administrativna i medicinska pitanja u NS FBiH, ligama ili klubovima

IGRAČ: Svaki nogometaš registrovan u skladu sa važećim FIFA-inim odredbama

ORGANIZIRANI NOGOMET: Nogomet koji je pod kontrolom FIFA-e i koji se organizira u skladu sa Pravilima igre

SKUPŠTINA: Najviše zakonodavno tijelo NS FBiH

IZVRŠNI ODBOR: Izvršni organ NS FBiH

ČLAN: Pravno ili fizičko lice koje je Skupština primila u članstvo NS FBiH

REDOVNI SUDOVI: Redovni sudovi u Federaciji BiH koji rješavaju sporove u skladu sa nadležnošću propisanom Ustavom FBiH i drugim zakonima FBiH

ARBITRAŽNI TRIBUNAL: Nezavisni i nepristrasni arbitražni tribunal koji su osnovala pravna ili fizička lica i koji djeluje umjesto redovnog suda u okviru djelokruga rada i nadležnosti, osnovano u skladu sa državnim zakonima Bosne i Hercegovine.

CAS: Sud za arbitražu u sportu, u Lozani (Švicarska)

*Napomena: Termini koji se odnose na fizička lica važe za oba gramatička roda/pola, a svaki termin u jednini važi za množinu i obratno*

## **II OPĆE ODREDBE**

### **Pravni status**

#### **Član 1.**

Nogometni savez Federacije Bosne i Hercegovine (u daljem tekstu Savez) je sportsko udruženje/udruga od javnog interesa u obliku dobrovoljnog udruživanja fizičkih ili pravnih lica/osoba na području Federacije Bosne i Hercegovine radi unaprjeđenja i ostvarivanja zajedničkog ili općeg interesa ili cilja u oblasti nogometnog sporta u koje su ravnopravno udruženi nogometni savezi kantona/županija: FS Kantona Sarajevo, NS Zeničko-dobojskog kantona, NS Tuzlanskog kantona, NS Srednjobosanskog kantona/Kantona Središnja Bosna, NS Unsko-sanskog kantona, NS Posavske županije-Orašje, NS Hercegovačko-neretvanskog kantona/županije, ŽNS Zapadnohercegovački, FS Bosansko-podrinjskog kantona i ŽNS Hercegbosanski (u daljem tekstu: članovi Saveza) u skladu sa Ustavom i Zakonom, a čija osnovna svrha nije sticanje dobiti.

Savez je nevladino, nepolitičko i nestranačko nezavisno sportsko udruženje/udruga od javnog interesa na nivou Federacije Bosne i Hercegovine u cilju unaprjeđenja i razvoja nogometa u Federaciji BiH.

Savez je po svom karakteru, organizaciji i ciljevima samostalna nogometna asocijacija na nivou Federacije BiH sa zadatkom da organizira i unaprjeđuje nogometni sport u Federaciji BiH, a u skladu sa ovim Statutom, odlukama Skupštine i Izvršnog odbora Saveza, kao i Statutima Nogometnog/Fudbalskog saveza Bosne i Hercegovine, UEFA-e i FIFA-e.

#### **Član 2.**

Ovim Statutom, a u skladu sa Zakonom, uređuju se sljedeće oblasti i odredbe o: nazivu, sjedištu i obilježjima Saveza, skraćenom nazivu, adresi, ciljevima udruženja/udruga i pravima i obavezama članova Saveza, organima udruženja/udruga, ovlašćenjima/ovlastima, pravilima glasanja, korištenju i raspolaganju sredstava, javnosti rada, zastupanju, rješavanju sporova, prestanku rada i raspolaganju imovinom, izvorima finansiranja Saveza, izmjenama i dopunama Statuta, stupanju na snagu Statuta i drugim pitanjima.

## **III NAZIV, SJEDIŠTE I OBILJEŽJA**

#### **Član 3.**

- 1 Naziv sportskog udruženja/udruga je: Nogometni savez Federacije Bosne i Hercegovine – skraćeno: NS FBiH.
- 2 Sjedište saveza je u Sarajevu, ulica Franca Lehara br. 3
- 3 Savez ima znak, zastavu, pečat i štembilj.
- 4 Oblik i sadržaj znaka, zastave, teksta pečata i štembilja utvrđuje Izvršni odbor Saveza posebnom odlukom i mora se jasno razlikovati od drugih naziva i znaka drugih udruženja/udruga.

### **Pravni subjektivitet, jezici i obaveze**

#### **Član 4.**

- 1 Savez ima svojstvo pravne osobe koje stiče danom upisa u registar udruženja/udruga u skladu sa Zakonom, pravima i obavezama utvrđenih Zakonom i ovim Statutom.
- 2 Savez se upisuje u registar udruženja/udruga kod Federalnog ministarstva pravde u skladu sa Pravilnikom o registraciji udruženja/udruga građana i fondacija Bosne i Hercegovine.

- 3 Savez za preuzete obaveze odgovara sopstvenom imovinom (potpuna odgovornost).
- 4 Savez ima svoj žiro-račun.
- 5 Službeni jezici Saveza su jezici utvrđeni Ustavom Federacije Bosne i Hercegovine uz upotrebu latiničnog i ćiriličnog pisma.
- 6 Savez je udružen u Nogometni/Fudbalski savez Bosne i Hercegovine.
- 7 Savez ima sljedeće dužnosti:
- a) da u potpunosti poštuje Statut, propise, direktive i odluke tijela NS/FS BiH, kao i odluke CAS-a donesene po žalbi na osnovu Statuta NS/FS BiH,
  - b) da učestvuje u takmičenjima koja organizira NS/FS BiH (ako je to primjenjivo),
  - c) da plaća članarinu i druge naknade kako to definira NS/FS BiH,
  - d) Savez, članovi, pridruženi članovi, klubovi, igrači, treneri, službena lica i dr. - putem svojih statuta, licenci, registracija ili nekog drugog pisanog dokumenta obavezuju se:
    - I pridržavati se Statuta, propisa, direktiva FIFA-e, UEFA-e, NS/FS BiH i NS FBiH, kao i odluka drugih tijela,
    - II poštovati principe lojalnosti, integriteta, sportskog duha i fer pleja,
    - III poštivati Pravila nogometne igre koja je izdao IFAB ili Pravila igre za mali nogomet i nogomet na pijesku, koja je izdao Izvršni komitet FIFA-e,
    - IV priznavati CAS kao nezavisni i nepristrasni arbitražni tribunal za državna i međunarodna pitanja, kako je to definirano Statutom NS/FS BiH, kao i statutima FIFA-e i UEFA-e, te prihvatiti svaku odluku CAS-a,
    - V izbjegavati bilo kakav oblik diskriminacije, kako je to definisano članom 5. Statuta NS/FS BiH.
    - VI da izvršno tijelo bude slobodno izabrano, te da druga statutarna tijela budu birana ili imenovana na potpuno nezavisan način, bez uticaja trećih lica,
    - VII da izabrani delegati ili zamjenski delegati za Generalnu Skupštinu NS/FS BiH imaju dužnost da prisustvuju redovnoj ili vanrednoj Generalnoj Skupštini NS/FS BiH,
    - VIII osigurati da imenovani ili izabrani članovi ili zamjenski članovi nekog statutarnog tijela NS/FS BiH imaju dužnost da prisustvuju sastancima na koje su pozvani,
    - IX da klubovi mogu sve svoje odluke donositi nezavisno od trećih lica i bez obzira na korporativnu strukturu koju je klub izabrao, te uzimajući u obzir propise o zaštiti integriteta takmičenja,
    - e) da svoje poslove vode nezavisno i da osiguraju da njihovi poslovi nisu pod uticajem trećih lica,
    - f) da održi izbornu Skupštinu u istoj godini kad i NS/FS BiH, a između 30 i 90 dana prije datuma izborne Generalne skupštine NS/FS BiH,
    - g) da osigura da je mandat predsjednika maksimalno četiri godine,
    - h) da poštuje i unaprjeđuje jedinstvo NS/FS BiH,
    - i) da ne održava bilo kakve kontakte sa savezima članovima FIFA-e i UEFA-e bez prethodnog odobrenja NS/FS BiH; isto važi za bilo koji savez koji je suspendiran ili isključen iz FIFA-e, uključujući pridružene članove,
    - j) da se u potpunosti pridržava svih drugih dužnosti koje proizilaze iz Statuta NS/FS BiH i drugih propisa.
- 8 NS FBiH se obavezuje da će usko sarađivati sa NS/FS BiH u cilju razvoja i unaprjeđenja nogometa na svim nivoima, kao i na organizaciji takmičenja na nivou BiH.
- 9 NS/FS BiH organizuje završna takmičenja državnih šampionata za seniorski i juniorski nogomet (top divizija), kao i državna kup takmičenja i finalna takmičenja u različitim kategorijama omladinskog, ženskog i malog nogometa, te kup regija. Sva preostala takmičenja u Federaciji BiH u nadležnosti su NS FBiH.
- 10 Savez ima prava i obaveze koje proizilaze iz takmičenja koja su u njegovoj nadležnosti. U skladu sa propisima NS/FS BiH, ima i obavezu da:



- a) registrira klubove i pojedince (igrače, trenere, sudije i zvaničnike) i vodi evidenciju o njima,
  - b) odobrava stadione i druge nogometne objekte, koji su smješteni na teritoriji FBiH,
  - c) NS/FS BiH pruža sve potrebne informacije na njegov zahtjev.
- 11 Savez može prethodno navedena prava i dužnosti dodijeliti u nadležnost kantonalnim/županijskim savezima, uz saglasnost NS/FS BiH.

## **Neutralnost i nediskriminacija**

### **Član 5.**

- 1 NS FBiH je neutralan u političkim i vjerskim pitanjima.
- 2 Diskriminacija bilo koje vrste, protiv neke zemlje, privatnog lica ili grupe ljudi, na osnovu etničkog porijekla, spola, jezika, politike ili bilo kog drugog razloga, strogo je zabranjena i može se sankcionisati suspenzijom, isključenjem ili drugim disciplinskim mjerama.

## **Pravila igre**

### **Član 6.**

- 1 NS FBiH i svaki njegov član igraju organizovani nogomet u skladu sa Pravilima igre koje je izdao IFAB, ili sa Pravilima igre za mali nogomet i nogomet na pijesku, koje je izdao Izvršni komitet FIFA-e.
- 2 Samo IFAB ili Izvršni komitet FIFA-e mogu propisati ili izmijeniti odgovarajuća Pravila igre.

## **Ciljevi izadaci**

### **Član 7.**

- 1 Ciljevi Saveza su sljedeći:
- a) da se bavi svim pitanjima koja se odnose na nogomet na području Federacije Bosne i Hercegovine i BiH,
  - b) da rukovodi svim tipovima nogometa, razvija ih i unaprjeđuje na svim nivoima na cijelom teritoriju Federacije BiH u skladu sa ovim Statutom,
  - c) da rukovodi takmičenjima koja su u njegovoj nadležnosti, razvija ih i unaprjeđuje na svim nivoima na cijelom teritoriju Federacije BiH,
  - d) da održava kontakte i surađuje sa NS/FS BiH, FS RS i sa nogometnim savezima koji su njegovi članovi (kantonalni/županijski savezi),
  - e) da štiti i poštuje prava i interese svojih članova i da rješava sporove među njima,
  - f) da unaprjeđuje nogomet u duhu mira i fer pleja, bez diskriminacije po političkom, spolnom, vjerskom i rasnom osnovu,
  - g) da poštuje principe lojalnosti, integriteta i sportskog duha u skladu sa principima fer pleja.
- 2 Kao dio gore definiranih ciljeva, Savez je odgovoran za sljedeće:
- a) da rukovodi svim takmičenjima na nivou Federacije BiH koja su mu data u nadležnost odlukom Skupštine NS/FS BiH i da definira uvjete njihove organizacije,
  - b) da definira opće organizacione i administrativne principe za nogomet u Federaciji BiH,

- c) da donosi programe i pravilnike školovanja i stručnog usavršavanja kadrova za rad u nogometu u Federaciji BiH,
- d) da definira ovlaštenja koja se dodjeljuju kantonalnim/županijskim savezima ili bilo kojem udruženju na nivou Saveza, kao i njihova prava i obaveze. Statuti i Pravilnici svakog takvog udruženja podliježu odobrenju od strane Saveza.
- e) da osigurava izvore novčanih sredstava za financiranje nogometnog sporta a Savez svoju djelatnost ne smije obavljati radi sticanja dobiti. Ako u obavljanju svoje djelatnosti NS FBiH ostvari dobit, ona se mora koristiti isključivo za obavljanje i unaprjeđenje djelatnosti Saveza, kojima se ostvaruju ciljevi Saveza.
- f) obavlja i druge poslove i djelatnosti određene zakonom, Statutom i pravilnicima Saveza.

## **IV ČLANSTVO**

### **Članovi Saveza**

#### **Član 8.**

- 1 Članovi saveza su deset kantonalnih/županijskih saveza: Fudbalski savez Kantona Sarajevo, Nogometni savez Zeničko-dobojskog kantona, Nogometni savez Tuzlanskog kantona, Nogometni savez Srednjobosanskog kantona/Kantona Središnja Bosna, Nogometni savez Unsko-sanskog kantona, Nogometni savez Posavske županije- Orašje, Nogometni savez Hercegovačko-neretvanskog kantona/županije, Županijski nogometni savez Zapadnohercegovački, Fudbalski savez Bosansko-podrinjskog kantona i Županijski nogometni savez županije Hercegbosanske.
- 2 Teritorijalna baza tih deset kantonalnih/županijskih nogometnih saveza odgovara kantonima/županimama onako kako su definisani Dejtonskim sporazumom, Ustavom BiH i Federacije BiH.
- 3 Članovi Saveza mogu biti i asocijacije klubova, kao i pojedinaca (treneri, sudije i dr.), ukoliko ispunjavaju uslove iz ovog Statuta.

### **Prijem u članstvo**

#### **Član 9.**

- 1 Skupština Saveza, na osnovu preporuke Izvršnog odbora NS FBiH prima u članstvo i vrši suspenziju ili isključuje iz članstva bilo kojeg člana NS FBiH.
- 2 Svako pravno lice koje želi posati član NS FBiH mora se pismeno prijaviti Sekretarijatu, koji podnosi pismeni izvještaj Izvršnom odboru.
- 3 Zahtjev sadrži:
  - a) primjerak zakonski važećeg Statuta i propisa, osnivački dokument i dokaz o registraciji kod nadležnog državnog organa,
  - b) izjavu da će sve domaće utakmice igrati na teritoriji Bosne i Hercegovine,
  - c) izjavu da se podnosilac prijave obavezuje da će uvijek poštivati Statut, propise, direktive i odluke NS FBiH, NS/FS BiH, FIFA-e i UEFA-e, te osigurati da ih poštuju i svi njegovi članovi, klubovi, službena lica, igrači i treneri,
  - d) izjavu da je podnosilac prijave saglasan da se pridržava važećih Pravila nogometne igre koja je objavio IFAB, kao i Pravila igre za mali nogomet i nogomet na pijesku, koja je objavio Izvršni odbor FIFA-e,

- e) izjavu da priznaju nadležnost Arbitražnog suda (CAS) u Lozani (Švicarska), kako je navedeno u relevantnim odredbama Statuta FIFA-e i Statuta UEFA-e,
  - f) izjavu da je saglasan da će u posljednjoj instanci svi sporovi domaćeg karaktera, koji proizilaze ili su vezani za primjenu Statuta NS FBiH, propisa, direktiva ili odluka donesenih na osnovu tog Statuta, ili vezanih za bilo kakav ugovor, prosljeđivati na isključivu nadležnost nezavisnog i nepristrasnog arbitražnog tribunala, konkretno CAS-a u Lozani, kako je to navedeno u relevantnim odredbama Statuta FIFA-e, UEFA-e, NS/FS BiH i NS FBiH, dok se zakonodavstvom BiH ne uspostavi odgovarajući arbitražni tribunal, koji zadovoljava minimalne zahtjeve FIFA-e i UEFA-e. CAS će donositi konačna rješenja sporova bez redovnih sudova, osim ako to nije eksplicitno zabranjeno važećim zakonodavstvom Bosne i Hercegovine,
  - g) izjavu kojom pokazuje da zakonski sastav podnosioca zahtjeva za članstvo u NS FBiH, bez obzira na svoju pravnu strukturu, garantuje da je u stanju sve svoje odluke donositi nezavisno od bilo kojeg vanjskog tijela,
  - h) dosje koji sadrži detalje o organizacionoj strukturi podnosioca zahtjeva (npr. broj klubova, igrača, službenih lica, sudija, trenera, imovine i tijela, itd.),
  - i) listu svojih službenika, navodeći one koji su ovlašteni potpisnici sa pravom izvršenja pravno obavezujućih sporazuma sa trećim stranama,
  - j) izjavu da se podnosilac zahtjeva slaže da će organizirati i učestvovati u prijateljskim utakmicama samo uz prethodnu saglasnost NS FBiH,
  - k) primjerak zapisnika sa zadnje sjednice Skupštine podnosioca zahtjeva ili sa njegovog osnivačkog sastanka,
  - l) izjavu da će podnosilac zahtjeva osigurati da se njegovi članovi, klubovi, dužnosnici, igrači, treneri medicinsko osoblje i dr. pridržavaju zahtjeva navedenih pod gornjim tačkama b) do g) putem Statuta, registracije, licence ili nekog drugog pisanog i potpisanog dokumenta.
- 4 Asocijacije pojedinaca moraju svoje aktivnosti organizirati na cijeloj teritoriji Federacije BiH i to navesti u svojoj prijavi.
- 5 Asocijacije ili grupe klubova nadalje moraju dati izjavu da niti jedno pravno ili fizičko lice (uključujući holding kompanije i podružnice) nema kontrolu nad više od jednog kluba ili grupe, kad god bi integritet bilo koje utakmice ili takmičenja mogao biti ugrožen.

### **Zahtjev i procedura za prijem u članstvo**

#### **Član 10.**

- 1 Skupština usvaja posebne propise koji regulišu proceduru prijema.
- 2 Izvršni odbor Skupštini preporučuje da li da primi ili ne primi nekog podnosioca zahtjeva u članstvo.
- 3 Podnosilac zahtjeva može iznijeti Skupštini razloge za svoju prijavu u članstvo.
- 4 Skupština na osnovu svog punog diskrecionog prava donosi konačnu odluku o prijavi nekog kandidata za članstvo u NS FBiH. Delegati imaju pravo da glasaju, a rezultati tog glasanja na snagu stupaju odmah.

### **Prava članova**

#### **Član 11.**

- 1 Članovi imaju sljedeća prava:
  - a) da učestvuju u Skupštini NS FBiH, da unaprijed dobiju njen dnevni red, da budu pozvani na Skupštinu u propisanom vremenu, te da ostvaruju svoje pravo glasa,
  - b) da daju prijedloge za uključjenje u dnevni red Skupštine,

- c) da nominuju kandidate za izbor u sva tijela NS FBiH,
  - d) da podnose zahtjev za sazivanje vanredne Skupštine,
  - e) da budu obaviješteni o poslovima NS FBiH, kroz njena zvanična tijela,
  - f) da učestvuju u takmičenjima (ako je to primjenjivo) i/ili drugim sportskim aktivnostima koje organizira NS FBiH,
  - g) da ostvaruje sva druga prava koja proizilaze iz Statuta i propisa NS FBiH.
- 2 Ostvarivanje ovih prava podliježe drugim odredbama Statuta i važećih propisa.

## **Obaveze članova**

### **Član 12.**

1 Članovi imaju sljedeće dužnosti:

- a) da u potpunosti i uvijek poštuju Statut, propise, direktive i odluke tijela NS FBiH i NS/FS BiH, kao i odluke CAS-a donesene po žalbi na osnovu ovog Statuta,
- b) da učestvuju u takmičenjima koja organizira NS FBiH (ako je to primjenjivo),
- c) da plaćaju članarinu i druge naknade, kako to definiše NS FBiH i NS/FS BiH.

2 Članovi, pridruženi članovi, klubovi, igrači, treneri, službena lica i dr. moraju:

- I da se pridržavaju principa lojalnosti, integriteta, sportskog duha u skladu sa duhom fer pleja,
- II da poštuju principe netralnosti i nediskriminacije u političkim i vjerskim pitanjima, u skladu sa članom 5. Statuta NS/FS BiH,
- III da se pridržavaju važećih Pravila igre, kako ih je objavio IFAB kao i Pravila igre za mali nogomet i nogomet na pijesku, koje je objavio izvršni odbor FIFA-e,
- IV da se obavežu Statutom, da će se pridržavati propisa i direktiva NS FBiH, NS/FS BiH, FIFA-e i UEFA-e, kao i odluka donesenim u skladu sa njima,
- V da priznaje nadležnost CAS-a, kako je navedeno u relevantnim odredbama Statuta FIFA-e i Statuta UEFA-e,
- VI sve sporove koji su rezultat ili proizilaze iz primjene Statuta NS FBiH i Statuta NS/FS BiH, propisa, direktiva ili odluka donesenih na osnovu Statuta ili u vezi sa bilo kakvim ugovorom, u posljednjoj instanci iznose pred isključivu nadležnost nezavisnog i nepristrasnog arbitražnog tribunala, konkretno CAS-a u Lozani (Švicarska), kako je to navedeno u relevantnim odredbama Statuta FIFA-e i Statuta UEFA-e statuta, dok propisima Bosne i Hercegovine ne bude ustanovljen odgovarajući arbitražni tribunal na teritoriji Bosne i Hercegovine, koji ispunjava minimalne zahtjeve FIFA-e i UEFA-e. CAS će davati konačna rješenja takvih sporova bez učešća redovnog suda, osim ako to nije eksplicitno zabranjeno važećim zakonodavstvom u Bosni i Hercegovini.

3 Članovi se obavezuju da će usko saradivati sa Savezom u cilju razvoja i unaprjeđenja nogometa na svim nivoima, kao i na organizaciji takmičenja na nivou FBiH. Savez organizira najmanje jedno prvenstvo i jedan kup na nivou FBiH i podstiče druga takmičenja.

4 Članovi imaju prava i obaveze da vrše registraciju i evidenciju igrača, stručnih kadrova, nogometnih klubova, objekata i terena na području FBiH u skladu sa propisima i pravilima NS FBiH, odnosno NS/FS BiH.

5 Članovi se obavezuju da će izbjeći formiranje raznih interesnih grupa, koje prejudiciraju ili bi mogle prejudicirati jedinstvo nogometa u FBiH.

6 Članovi se obavezuju da će poštovati i unaprjeđivati interes i cjelovitost Saveza.

7 Da održavaju izbornu Skupštinu u istoj godini kad i NS FBiH, a između 30 i 90 dana prije datuma izborne Skupštine NS FBiH.

- 8 Članovi moraju osigurati da se izvršno tijelo njihove asocijacije bira putem slobodnih izbora i da tu odredbu uključe u njihove Statute, u protivnom, Savez će odbiti da prizna takvo tijelo.
- 9 Da osiguraju da je mandat njihovih predsjednika maksimalno četiri godine.
- 10 Statuti članova sadrže odredbu da je svaki klub koji je član asocijacije u poziciji da donosi vlastite odluke po svim pitanjima vezanim za svoje članstvo i to neovisno od bilo kojeg vanjskog dijela. Posebno, svaki kantonalni/županijski savez mora uputiti svoje klubove da se pridržavaju tih obaveza, neovisno o korporativnoj strukturi koju klub izabere.
- 11 Da će blisko sarađivati sa NS FBiH u cilju razvoja i unaprjeđenja nogometa na svim nivoima, kao i na organizaciji takmičenja na nivou FBiH
- 12 Da će organizirati takmičenja koja mu u nadležnost ustupi NS FBiH.
- 13 nije dopušteno da članovi održavaju kontakte sa nogometnim savezima učlanjenim u FIFA-u, UEFA-u, bez odobrenja od strane Saveza i NS/FS BiH.
- 14 Da se u potpunosti pridržavaju svih drugih dužnosti koje proizilaze iz ovog Statuta i drugih propisa.
- 15 Ako bilo koji član prekrši gore navedene dužnosti, to može dovesti do sankcija predviđenih ovim Statutom. Nadležna pravna tijela NS FBiH mogu izreći daljnje sankcije.

### **Istupanje i prestanak članstva, raspuštanje asocijacije članova i gubitak članskog statusa**

#### **Član 13.**

- 1 Član Saveza može istupiti iz članstva Saveza na kraju fiskalne godine, pod uslovom da o tome obavijesti Skupštinu putem Sekretarijata Saveza šest mjeseci unaprijed.
- 2 Istupanjem iz članstva Saveza udruženi član gubi status asocijacije koji je ostvario putem Saveza, a njegov članski status i prava istovremeno prestaju.
- 3 Član može biti isključen iz Saveza u slučaju da:
- a) ne ispuni svoje finansijske obaveze prema Savezu,
  - b) teško i ponovljeno krši Statut, pravilnike i odluke Saveza,
  - c) ugrožava interese i jedinstvo Saveza,
  - d) izgubi svojstva na bazi kojih je dobio članski status.
- 4 Odluku o prestanku članstva donosi Skupština u skladu sa odredbama ovog Statuta.
- 5 Član mora ispuniti sve svoje finansijske obaveze prema Savezu prije nego što izgubi članski status.
- 6 Istupanjem iz članstva jednog od članova Saveza (kantona/županije) prestaju važiti odredbe ovog Statuta za člana Saveza koji istupi iz članstva.

### **V POČASNI PREDSJEDNIK I POČASNI ČLAN**

#### **Član 14.**

Na prijedlog Izvršnog odbora, Skupština može dodijeliti status počasnog predsjednika ili počasnog člana. Taj status dodjeljuje se za posebne zasluge u nogometu. Počasni predsjednici i počasni članovi mogu prisustvovati Skupštini u savjetodavnom svojstvu ali nemaju pravo glasa.

## **VI ORGANIZACIJA**

### **Organi, tijela i nezavisnost**

#### **Član 15.**

- 1 NS FBiH ima sljedeća tijela koja donose odluke:
  - a) Skupština (zakonodavno tijelo)
  - b) Izvršni odbor (izvršno tijelo)
  - c) Predsjednik (osoba ovlaštena za predstavljanje i zastupanje)
  - d) Pravna tijela
  - e) Generalni sekretar (administrativno tijelo)
  
- 2 NS FBiH ima sljedeća konsultativna tijela:
  - a) Stalne komisije
  - b) Ad-hok komisije
  - c) Nezavisnog revizora
  - d) Sekretarijat
  
- 3 Izvršni odbor NS FBiH može stalnim komisijama prenijeti ovlaštenje za odlučivanje, kako je definisano u njihovom opisu poslova i zadataka.
- 4 Svi članovi tih organa i tijela NS FBiH dužni su pridržavati se FIFA-inog Etičkog kodeksa prilikom vršenja svojih funkcija, kako je definisano ovim Statutom i relevantnim propisima.
- 5 Član Izvršnog odbora (uključujući predsjednika i dopredsjednika) ne može istovremeno biti i član pravnog tijela, delegat Skupštine ili generalni sekretar i obratno.
- 6 Član nekog statutarnog tijela/organa NS FBiH ne smije učestvovati u donošenju odluka po bilo kojem pitanju u kojem postoji ili može nastati sukob interesa.
- 7 Svaki član statutarnog organa ili tijela NS FBiH dužan je prisustvovati pravovaljano sazvanim sastancima. Odsustva bez opravdanih razloga mogu dovesti do sankcija u skladu sa Statutom i Disciplinskim pravilnikom NS/FS BiH i dodatno dovesti do zamjene takvog člana u skladu s ovim Statutom.  
Glasanje putem opunomoćenika u nekom statutarnom organu ili tijelu nije dozvoljeno.
- 8 Svaki član nekog organa ili tijela NS FBiH ima jedan glas.

#### **Uslovi za status člana organa ili tijela NS FBiH**

#### **Član 16.**

- 1 Da bi postao kandidat za neki statutarni organ ili tijelo u NS FBiH, ta osoba mora ispunjavati sljedeće kumulativne uvjete:
  - a) biti udružen u NS FBiH ili u neki od njegovih statutarnih članova,
  - b) biti izabrani ili imenovani član udružen u NS FBiH ili u neki od njegovih statutarnih članova,
  - c) biti aktivan u nogometu,
  - d) mora biti državljanin Bosne i Hercegovine i priložiti biografiju (CV) koja sadrži informacije o obrazovanju i profesionalnim iskustvima,
  - e) mora biti stalno nastanjen u Bosni i Hercegovini,
  - f) ne smije biti suspendiran ili isključen u okviru NS FBiH, NS/FS BiH ili nekog svog statutarnog člana,
  - g) mora podnijeti dokaz da protiv njega ne postoji krivična istraga niti da je osuđivan za krivično djelo na bezuslovnu kaznu dužu od tri mjeseca zatvora.

- 2      Zahtjevi stavova 1e) i 1g) ovog člana primjenjuju se i na generalnog sekretara i druge uposlenike Sekretarijata. Međutim, izvršni odbor može kroz organizacione propise za njih postaviti daljne zahtjeve.
- 3      Ako osoba tokom svog mandata u NS FBiH prestane ispunjavati jedan od gore navedenih uvjeta, on odmah gubi status člana organa ili tijela NS FBiH.

## **VII SKUPŠTINA**

### **Član 17.**

- 1      Skupština je najviši organ upravljanja i odlučivanja u Savezu.
- 2      Skupština može zasjedati kao redovna i vanredna.
- 3      Redovna Skupština zasjeda jednom godišnje, obično u prvoj polovini kalendarske godine.
- 4      Redovna izborna Skupština zasjeda svake četiri godine

### **Članovi Skupštine**

#### **Član 18.**

- 1      Skupština se sastoji od 40 delegata pravovaljano izabranih na Skupštini 10 kantonalnih/županijskih saveza.
- 2      Sljedeće osobe se pozivaju da prisustvuju Skupštini:
- a)      delegati članova NS FBiH,
  - b)      članovi Izvršnog odbora Saveza,
  - c)      počasni predsjednici i počasni članovi,
  - d)      predsjednik i generalni sekretar NS/FS BiH,
  - e)      drugi gosti koje pozove Izvršni odbor NS FBiH.
- 3      Samo delegati članova NS FBiH imaju pravo glasa na Skupštini NS FBiH.

#### **Član 19.**

- Raspodjela glasova je sljedeća:
- a)      Delegati Skupštine Saveza imaju svaki po jedan glas i svaki kantonalni/županijski nogometni savez ima četiri delegata.
  - b)      Način i postupak aktiviranja zamjenskog delegata propisan je članom 20. tačka 4. ovog Statuta.

### **Delegati na Skupštini**

#### **Član 20.**

- 1      Svaki član NS FBiH (kantonalni/županijski savez) dostavlja Sekretarijatu listu svojih delegata koji su pravovaljano i slobodno izabrani na njihovoj Skupštini. Delegati se biraju najkasnije dva mjeseca prije sjednice Skupštine Saveza.
- 2      Svaki kantonalni/županijski savez bira četiri delegata i 2 zamjenska delegata Skupštine NS FBiH za mandat od četiri godine.
- 3      Mandat delegata u Skupštini traje 4 (četiri) godine i počinje da teče od dana verifikacije njegovog mandata u Skupštini, a ističe danom verifikacije mandata članova Skupštine novog-sljedećeg saziva Skupštine.

- 4 Delegat koji nije u mogućnosti da prisustvuje Skupštini iz bilo kog razloga, mora se odmah javiti generalnom sekretaru NS FBiH, da bi imenovao zamjenu. Nakon obaveznih konsultacija sa odgovarajućim generalnim sekretarom člana (kantonalni/županijski savezi), generalni sekretar NS FBiH imenuje zamjenske delegate, nakon što od datog generalnog sekretara dobije ažuriranu listu dostupnih zamjenskih delegata. Takav imenovani zamjenski delegat prisustvuje Skupštini NS FBiH umjesto onog delegata koji to nije u mogućnosti.
- 5 Delegati se biraju najkasnije dva mjeseca prije sjednice Skupštine Saveza.
- 6 Na osnovu predložene liste svojih delegata koji su pravovaljano i slobodno izabrani na skupštinama kantonalnih/županijskih saveza, Skupština NS FBiH bira četrdeset (40) delegata i dvadeset (20) zamjenskih delegata Skupštine NS/FS BiH za mandat od četiri (4) godine, u skladu sa Pravilnikom o radu Skupštine NS/FS BiH.

### **Kvorum prisustva Skupštini**

#### **Član 21.**

- 1 Skupština (redovna ili vanredna) zasjeda pravovaljano i ima kvorum ako je prisutno  $\frac{3}{4}$  od ukupnog broja delegata (30 delegata) i odlučuje  $\frac{3}{4}$  većinom od ukupnog broja delegata.
- 2 U slučaju da nije postignut kvorum, Skupština zasjeda po istom dnevnom redu narednog dana na istom mjestu i u isto vrijeme. Ovom drugom zasjedanju mora prisustvovati natpolovična većina (50%+1) od ukupnog broja delegata da bi se donosile pravovaljane odluke.
- 3 Ako se ponovo ne postigne taj kvorum, Izvršni odbor NS FBiH saziva novu Skupštinu po istom dnevnom redu u roku od 15 dana. Generalni sekretar NS FBiH šalje pozive članovima i delegatima. Toj sjednici nije neophodan kvorum većina.

### **Nadležnost Skupštine**

#### **Član 22.**

- 1 Skupština ima sljedeće nadležnosti:
- a) usvaja, mijenja i dopunjava dnevni red, osim u slučajevima iz člana 21. stav 2. i 3.
  - b) bira dva delegata kao ovjerivače zapisnika,
  - c) usvaja Statut Saveza, kao i njegove izmjene i dopune,
  - d) usvaja Poslovnik o radu Skupštine, kao i izmjene i dopune Poslovnika,
  - e) usvaja opis poslova i zadataka pravnih tijela,
  - f) bira i razrješava predsjednika i dopredsjednika,
  - g) bira i razrješava članove IO NS FBiH na osnovu liste kandidata kantonalnih/županijskih saveza,
  - h) bira nezavisno revizorsko tijelo za reviziju obračuna,
  - i) verificira delegate Skupštine,
  - j) usvaja plan prihoda i rashoda Saveza za tekuću godinu,
  - k) razmatra i usvaja izvješće o financijskom poslovanju Saveza,
  - l) razmatra i usvaja izvještaj o radu Izvršnog odbora,
  - m) usvaja strukturu takmičenja na teritoriji FBiH,
  - n) usvaja nova i ukida takmičenja na teritoriji FBiH,
  - o) usvaja i razmatra programe i planove za sve vrste takmičenja na nivou Saveza, a sve na prijedlog Izvršnog odbora Saveza,
  - p) bira po potrebi radna tijela Skupštine (odbor za glasanje, komisija za verifikaciju),
  - r) dodjeljuje počasno članstvo,
  - s) razmatra i donosi odluke po drugim pitanjima koja ovim Statutom nisu dana drugom organu, a spadaju u djelokrug Saveza i to na prijedlog Radnog predsjedništva Skupštine ili Izvršnog odbora Saveza,



- t) bira i razrješava pravna tijela Saveza (predsjednika, dopredsjednika i članove Disciplinske i Apelacione komisije), te tužioce NS FBiH,
  - u) bira 40 delegata i 20 zamjenskih delegata Skupštine NS/FS BiH za mandat od četiri godine, a svaki kantonalni/županijski savez predlaže listu od po četiri delegata i dva zamjenska delegata koji su pravovaljano izabrani na skupštini kantonalnog/županijskog saveza,
  - v) odobrava listu od najmanje 19 kandidata (uključujući i zamjenske članove) za Izvršni odbor NS/FS BiH koji predstavljaju sve kantonalne/županijske nogometne saveze svaki sa po dva kandidata, a poslije 2019. godine najmanje 29 kandidata;
  - z) suspendira-isključuje članove ili službena lica Saveza,
  - y) učlanjuje članstvo u Savez i vodi evidenciju o istupanju iz Saveza.
- 2 Sve potrebne materijale, po pitanjima koja su u nadležnosti Skupštine Saveza, priprema Izvršni odbor Saveza, uz podršku nadležnih tijela i Sekretarijata.

### **Sazivanje, predlaganje članova, kandidature**

#### **Član 23.**

- 1 Odluku o sazivanju redovne sjednice Skupštine donosi Izvršni odbor Saveza na svoju inicijativu, ili na inicijativu pet kantonalnih/županijskih saveza. Izvršni odbor utvrđuje dnevni red sjednice.
- 2 Poziv za održavanje Skupštine sa prijedlogom dnevnog reda, vremenom i mjestom održavanja generalni sekretar upućuje članovima Skupštine i kantonalnim/županijskim nogometnim savezima i članovima Izvršnog odbora najkasnije u roku od 30 dana prije održavanja Skupštine.
- 3 Članovi Skupštine, odnosno kantonalni/županijski savezi mogu dostaviti prijedlog za izmjenu i dopunu dnevnog reda sa obrazloženjem i eventualnim pisanim materijalima generalnom sekretaru Saveza, koji je dužan sa istim upoznati predsjednika i Izvršni odbor Saveza, najkasnije 15 dana prije održavanja Skupštine. Generalni sekretar potrebne materijale sa konačnim dnevnim redom upućuje pozvanim najmanje deset dana prije Skupštine.
- 4 Kandidature za izborne funkcije (uključujući njihove radne biografije) moraju biti dostavljene pismenim putem u Sekretarijat najkasnije dva mjeseca prije datuma održavanja Skupštine Saveza.

### **Mandat predsjednika NS FBiH u IO NS/FS BiH**

#### **Član 24.**

- 1 Skupština NS FBiH predlaže najmanje 18 kandidata (uključujući i zamjenske članove) za Izvršni odbor NS/FS BiH koji predstavljaju devet (9) kantonalnih/županijskih nogometnih saveza, svaki sa po dva kandidata. Onaj kantonalni/županijski savez iz kojeg je predsjednik NS FBiH predlaže najmanje jednog kandidata za izbor zamjenskog člana.
- 2 Za izbore u NS/FS BiH nakon 2019. godine Skupština NS FBiH predlaže najmanje 27 imena koja predstavljaju devet (9) kantonalnih/županijskih saveza, ali ne sa više od tri (3) kandidata po svakom. Onaj kantonalni/županijski savez iz kojeg je predsjednik NS FBiH predlaže najmanje dva (2) kandidata za izbor zamjenskog člana.
- 3 Mandat člana IO NS/FS BiH po službenoj dužnosti (predsjednik NS FBiH) definiran je ovim Statutom i traje četiri godine.
- 4 Predsjednik NS/FS BiH koji dolazi iz NS FBiH u jednom mandatu se bira na prijedlog županijskih nogometnih saveza, a u drugom mandatu na prijedlog kantonalnih nogometnih saveza i tako naizmjenično, te se na ovaj način osigurava princip rotacije i ravnopravnosti županijskih i kantonalnih saveza.

## Vanredna Skupština

### Član 25.

- 1 Vanrednu sjednicu Skupštine saziva Izvršni odbor na pismeni zahtjev 5 (pet) kantonalnih/županijskih saveza preko većine svojih delegata. Zahtjev mora sadržavati teme za dnevni red i kratko obrazloženje zahtjeva, a mora se uputiti generalnom sekretaru Saveza.
- 2 Ako se pravovaljano zatraži sazivanje vanredne Skupštine, ona se mora održati u roku od najviše 30 dana. Poziv za Skupštinu i njen dnevni red generalni sekretar Saveza mora dostaviti pismenim putem članovima Saveza i delegatima Skupštine u roku od dvije sedmice.
- 3 Dnevni red vanredne Skupštine ne može se mijenjati.

## Rukovođenje Skupštinom

### Član 26.

Redovnom ili vanrednom Skupštinom rukovodi predsjednik, u slučaju odsutnosti predsjednika Skupštinom predsjedava dopredsjednik Saveza, a ukoliko su oni spriječeni da prisustvuju Skupštini, Skupštinom predsjedava najstariji član Izvršnog odbora Saveza.

## Izbori i glasanje

### Član 27.

- 1 Izbori se vrše tajnim glasanjem.
- 2 Druge odluke donose se aklamacijom sve dok Skupština ne odluči drugačije.
- 3 Nije dopušteno davanje punomoći za glasanje.
- 4 Suspendirani savezi ili savezi koji imaju status privremenog člana nemaju pravo glasa.
- 5 Da bi bio izabran u prvom krugu glasanja, kandidat mora dobiti natpolovičnu većinu izraženih glasova. U drugom krugu glasanja, u kojem učestvuju kandidati sa najvećim brojem glasova osvojenih u prvom krugu, kandidat mora dobiti najveći broj glasova.
- 6 Uzdržani glasovi, nevažeći listići, ili drugi neprihvatljivi načini glasanja neće se uzimati u obzir.

## Donošenje odluka

### Član 28.

- 1 Skupština Saveza odluke donosi tročetvrtinskom većinom od ukupnog broja članova Skupštine.
- 2 Kada Skupština zasjeda u novom sazivanju prema članu 21. stav 2. i stav 3. ovog Statuta, odluke se donose  $\frac{3}{4}$  većinom glasova prisutnih članova Skupštine.
- 3 Sljedeće odluke mogu biti donesene samo ako Skupština (redovna, vanredna ili ponovljena) ima kvorum od  $\frac{3}{4}$  većine od ukupnog broja članova Skupštine i ako dobije  $\frac{3}{4}$  većinu glasova ukupnog broja članova o:
  - a) promjeni sjedišta Saveza,
  - b) izmjeni dnevnog reda
  - c) usvajanju i izmjeni strukture prvenstva na razini NS FBiH (npr. broj ekipa koje sudjeluju, sustav natjecanja itd.),

- d) usvajanju, izmjeni i dopuni Statuta NS FBiH,
  - e) suspenziji i isključenju člana Saveza,
  - f) napuštanju- raspuštanju Saveza,
  - g) i drugim pitanjima o kojima odluči Skupština.
- 4 Odluke donesene na Skupštini provode se odmah, osim ako Skupština ne odluči drugačije.

## **ZAPISNIK**

### **Član 29.**

- 1 Generalni sekretar odgovoran je za vođenje zapisnika na sjednici Skupštine.
- 2 Zapisnik sa održane sjednice Skupštine potpisuju ovjerivači zapisnika u roku od dvije sedmice od održane sjednice Skupštine. Zapisnik se potom dostavlja članovima Skupštine u roku od 30 dana od sjednice Skupštine. Ako Sekretarijat ne primi nikakav prigovor u roku od dvije sedmice nakon dostave zapisnika, zapisnik se smatra prihvaćenim. Svi prigovori dostavljaju se na sljedeću redovnu Skupštinu, na kojoj se donosi definitivna odluka.

## **VIII IZVRŠNI ODBOR**

### **Struktura, sastav**

#### **Član 30.**

- 1 Izvršni odbor je izvršno tijelo Saveza.
- 2 Izvršni odbor sastoji se od 10 članova, među kojima su predsjednik i dopredsjednik, a to su:  
-10 članova pravovaljano izabranih na Skupštini NS kantonalnih/županijskih saveza, gdje je svaki kantonalni/županijski savez predstavljen jednim članom.
- 3 Svaki kandidat za člana Izvršnog odbora potvrđuje volju za prihvatanje funkcije člana ovog tijela pred Skupštinom Saveza.

### **Kandidature, mandat i zamjena**

#### **Član 31.**

- 1 Kantonalni/županijski savezi za člana Izvršnog odbora predlažu po dva kandidata (uključujući zamjenskog).
- 2 Kantonalni/županijski savezi dužni su generalnom sekretaru NS FBiH pismenim putem dostaviti imena (uključujući biografije koje sadrže informacije o obrazovanju i profesionalnim iskustvima) kandidata predloženih za izbor u Izvršni odbor najkasnije 30 dana prije datuma održavanja Skupštine.
- 3 Trajanje mandata članova izvršnog odbora je četiri godine.
- 4 Svaki član Izvršnog odbora može biti ponovno izabran.
- 5 Ako se pojavi upražnjeno mjesto redovnog člana Izvršnog odbora, to upražnjeno mjesto će biti automatski popunjeno za preostali dio mandata zamjenskim članom, koji predstavlja isti kantonalni/županijski nogometni savez kao odlazeći član.

## Nadležnost članova Izvršnog odbora

### Član 32.

Izvršni odbor:

- a) donosi smjernice za rad Saveza i članova Saveza (kantonalne/županijske saveze) u svim aspektima nogometa,
- b) donosi odgovarajuće odluke i smjernice vezano za obaveze Saveza prema NS/FS BiH, za koje ga ovlasti Skupština NS FBiH,
- c) donosi poslovnik o radu stalnih i ad hok komisija Saveza, te druge akte koji nisu u nadležnosti Skupštine,
- d) donosi prijedloge programa razvoja i unaprjeđenja nogometa na nivou Federacije BiH i BiH i u skladu s tim daje uputstva kantonalnim/županijskim savezima,
- e) utvrđuje prijedlog finansijskog plana-budžeta Saveza i priprema materijale za završni račun i za obračun prihoda i rashoda,
- f) donosi kalendar takmičenja na nivou FBiH,
- g) donosi sve pravilnike i poslovnike, osim onih čije je donošenje u nadležnosti Skupštine,
- h) donosi propozicije za organizaciju takmičenja na nivou Saveza,
- i) usvaja listu delegata na ligama kojima rukovodi,
- j) obrazuje i raspušta stalne i povremene komisije,
- k) imenuje predsjednike, dopredsjednike i članove stalnih i povremenih komisija iz svojih nadležnosti,
- l) razmatra i usvaja izvještaje stalnih i ad hok komisija i Sekretarijata Saveza,
- m) predlaže Skupštini kandidate za status počasnih članova,
- n) na osnovu provedene tenderske procedure predlaže nezavisnog revizora NS F BiH,
- o) imenuje i razrješava generalnog sekretara, utvrđuje uslove za imenovanje generalnog sekretara, njegove nadležnosti i ovlaštenja,
- p) nadzire Sekretarijat,
- r) donosi Pravilnik o sistematizaciji i djelokrugu rada Sekretarijata Saveza,
- s) sprovodi odluke i zaključke Skupštine i stara se o njihovoj realizaciji, podnosi Skupštini izvješće o svom radu,
- t) odlučuje o zaštiti Pravilnika po podignutim zahtjevima-vanrednim pravnim sredstvima,
- u) usvaja izvješća organa koji nisu u nadležnosti Skupštine,
- v) obavlja i druge poslove za koje ga ovlasti Skupština ili su predviđeni općim aktima NS FBiH,
- z) odlučuje i o svim ostalim pitanjima koja nisu u nadležnosti nekog drugog statutarnog tijela.

## Kalendar sjednica, dnevni red

### Član 33.

- 1 Izvršni odbor sastaje se u pravilu jednom mjesečno. Sjednicu saziva i njom predsjedava predsjednik. Na zahtjev jedne trećine članova, predsjednik saziva sjednicu Izvršnog odbora u roku od deset dana.
- 2 Članovi Izvršnog odbora mogu dostaviti generalnom sekretaru teme za dnevni red najmanje deset dana prije održavanja sjednice.
- 3 Dnevni red dostavlja se članovima Izvršnog odbora najmanje 7 dana prije sjednice, od strane generalnog sekretara.
- 4 Sjednica Izvršnog odbora NS FBiH nije otvorena za javnost. Izvršni odbor može pozvati treća lica da prisustvuju sjednici Izvršnog odbora. Ta treća lica nemaju pravo glasa, ali im je dozvoljeno da izraze svoje mišljenje uz dozvolu Izvršnog odbora.
- 5 Generalni sekretar prisustvuje sjednicama Izvršnog odbora u konsultativnom svojstvu.

## **Kvorum**

### **Član 34.**

- 1 Izvršni odbor ima kvorum kada sjednici prisustvuje najmanje 7 članova.
- 2 Ako se ne postigne ovaj kvorum, Izvršni odbor se automatski mora sastati narednog radnog dana na istom mjestu i u isto vrijeme, da bi razmatrao isti dnevni red.
- 3 U ponovljenoj sjednici Izvršni odbor ima kvorum ako je prisutno najmanje 6 članova.
- 4 Ipak, ako odluke koje se odnose na pitanja koja regulira član 32. tačke: c, e, f, g, h, i, j, k, n, o, r, t i u- Izvršnom odboru je potreban kvorum od najmanje 7 članova.

## **Donošenje odluka, suspenzija članova IO i pravnih tijela, suspenzija i isključenje članova komisija**

### **Član 35.**

- 1 Izvršni odbor donosi odluke sa najmanje 7 glasova od ukupnog broja članova.
- 2 U ponovljenoj sjednici, odluke se donose s najmanje 6 glasova od ukupnog broja članova Izvršnog odbora.
- 3 Za odluke iz člana 26. tačke: c, e, f, g, h, i, j, k, n, o, r, t i u- odluke se donose sa najmanje 7 glasova od ukupnog broja članova Izvršnog odbora.
- 4 U slučaju jednakog broja glasova, u ponovljenoj sjednici odlučuje glas predsjednika ili predsjedavajućeg.
- 5 Izvršni odbor donosi odluke samo o onim temama koje su pravovaljano stavljene na dnevni red.
- 6 Odluke Izvršnog odbora provode se odmah, osim ako izvršni odbor ne odluči drugačije.
- 7 Ako član Izvršnog odbora NS FBiH ne prisustvuje na najmanje tri propisno sazvana sastanka tokom iste kalendarske godine, Izvršni odbor mora razriješiti takvog člana i zamijeniti ga odgovarajućim zamjenskim članom do naredne Skupštine.
- 8 Ako član Izvršnog odbora napusti propisno sazvan sastanak bez opravdanog razloga, Izvršni odbor može, na osnovu svog diskrecionog prava, razriješiti takvog člana i zamijeniti ga odgovarajućim zamjenskim članom do naredne Skupštine.
- 10 Izvršni odbor može suspendirati jednog člana pravnog tijela do održavanja sljedeće Skupštine, ako se dokaže da je kriv za teške propuste u obavljanju svojih zadaća ili da je neispravno postupio. Konačnu suspenziju izriče Skupština.
- 11 Izvršni odbor može suspendirati ili isključiti iz funkcije članove komisija, te im imenovati zamjenu za preostalo trajanje mandata.

## **Komitet za hitnost NS FBiH**

### **Član 36.**

- 1 Komitet za hitnost NS FBiH bavi se svim pitanjima koja traže da budu riješena odmah, između dva sastanka Izvršnog odbora.
- 2 Komitet za hitnost sastoji se od četiri (4) člana:
  - a) predsjednika,
  - b) dopredsjednika,
  - c) druga dva (2) redovna člana Izvršnog odbora, koje imenuje predsjednik, od slučaja do slučaja, a u skladu sa njihovom dostupnošću i uz izbjegavanje sukoba interesa.
- 3 Jedan član mora predstavljati kantonalne saveze a drugi član županijske saveze.

- 4 Generalni sekretar, po zahtjevu predsjednika, saziva sastanke Komiteta za hitnost. Ako se sastanak ne može sazvati u odgovarajućem vremenskom roku, odluke se mogu donositi drugim sredstvima komunikacije (telefon, telefax, pismo ili elektronska pošta).
- 5 Ako predsjednik i/ili dopredsjednik nisu u mogućnosti da prisustvuju ili imaju sukob interesa, sastav Komiteta za hitnost upotpunjuje se kroz imenovanje daljnjih članova Izvršnog odbora, po redosljedu najviše rangiranog i nepristrasnog člana ili, u slučaju da su samo redovni članovi dostupni, po starini.
- 6 Član Izvršnog odbora koji u konačnici ima pravo da imenuje članove Komiteta za hitnost za konkretan slučaj, isto tako i predsjedava umjesto predsjednika.
- 7 Generalni sekretar zadužen je za administraciju Komiteta za hitnost i može prisustvovati sastancima u savjetodavnom svojstvu. Daje administrativnu podršku i vodi zapisnik na tim sastancima, koji podnosi svim članovima Izvršnog odbora, u pismenom obliku, u roku od tri radna dana.

### **Nadležnost i odlučivanje**

#### **Član 37.**

- 1 Komitet za hitnost je ovlašten da donosi odluke o hitnim pitanjima koja ulaze u nadležnost Izvršnog odbora.
- 2 Komitet za hitnost donosi valjane odluke ako svi imenovani članovi prisustvuju sastanku ili su uključeni u proces odlučivanja. Odluka se donosi ako je podrži najmanje tri člana, ali se uvijek mora tražiti konsenzus.
- 3 Ako se ne odluči drugačije, takva odluka stupa na snagu odmah.
- 4 Na narednoj sjednici Izvršnog odbora, predsjedavajući Komiteta za hitnost obavještava sve članove o vijećanju i odlukama, kao i o izvršenju tih odluka.

### **Predsjednik NS FBiH**

#### **Član 38.**

- 1 Predsjednik predstavlja i postupa u ime NS FBiH.
- 2 On je prvenstveno zadužen za:
- a) provođenje odluka koje donese Skupština i Izvršni odbor, kao i Komitet za hitnost, kroz Sekretarijat;
  - b) osiguravanje djelotvornog funkcioniranja tijela NS FBiH, da bi se ostvarili ciljevi opisani u ovom Statutu i programima koje odobri Skupština ili drugo nadležno tijelo;
  - c) nadziranje rada Sekretarijata;
  - d) održavanje odnosa između NS FBiH i njegovih članova, NS/FS BiH, svih drugih saveza članova i klubova, FS RS, kao i političkih vlasti i svih drugih organizacija.
- 3 Samo predsjednik može predložiti imenovanje ili razrješenje generalnog sekretara.
- 4 Uz podršku generalnog sekretara, predsjednik saziva i priprema sastanke Skupštine, Izvršnog odbora, kao i Komiteta za hitnost, kojem i predsjedava.
- 5 Predsjednik koordinira rad Skupštine, Izvršnog odbora i Komiteta za hitnost, te prati rad pravnih tijela, kao i stalnih i ad hok komisija.
- 6 U slučaju neriješenog glasanja na Izvršnom odboru ili Komitetu za hitnost, predsjednikov glas je odlučujući.
- 7 U odsutnosti predsjednika ili nemogućnosti da izvršava svoje dužnosti zbog bolesti ili nesreće, dopredsjednik preuzima njegova ovlaštenja i dužnosti. Ako ni dopredsjednik nije u mogućnosti da preuzme dužnost, Izvršni odbor imenuje zamjenika iz svojih članova, do naredne Skupštine.
- 8 Predsjednik, zajedno sa generalnim sekretarom, ima pravo da bude ovlašteni potpisnik, osim ako nije drugačije određeno propisima Izvršnog odbora.

## **Mandat predsjednika i dopredsjednika**

### **Član 39.**

- 1 Mandat predsjednika i dopredsjednika traje četiri godine.
- 2 Član Izvršnog odbora koji je dobio najviše glasova izabran je za predsjednika, a u vezi sa članom 27. stav 5.
- 3 Predsjednik i dopredsjednik moraju dolaziti iz kantonalnih i županijskih saveza. Za dopredsjednika je izabran član koji je sljedeći po broju glasova vodeći računa o zastupljenosti i ravnopravosti kantonalnih i županijskih saveza, a uvažavajući da predsjednik i dopredsjednik istovremeno ne mogu biti iz kantonalnih, odnosno iz županijskih saveza.
- 4 Predsjednik NS Federacije BiH u jednom mandatu bira se na prijedlog kantonalnih nogometnih saveza, a u drugom mandatu na prijedlog županijskih nogometnih saveza i tako naizmjenično, te se na ovaj način osigurava princip rotacije i ravnopravnosti kantonalnih i županijskih saveza.

## **Razrješenje pojedinca ili tijela**

### **Član 40.**

- 1 Skupština može razriješiti pojedinca ili tijelo. Izvršni odbor može razrješenje pojedinca ili tijela staviti na dnevni red Skupštine. Izvršni odbor može privremeno razriješiti pojedinca ili tijelo, što odmah stupa na snagu, ako je takvo lice počinilo teško kršenje Statuta, propisa ili odluka donesenih na osnovu Statuta ili izvršilo teško krivično djelo. Član Izvršnog odbora može podnijeti prijedlog da se takav zahtjev za razrješenje stavi na dnevni red Izvršnog odbora ili Skupštine.
- 2 Zahtjev za razrješenje mora biti opravdan. Šalje se članovima NS FBiH, zajedno sa dnevnim redom.
- 3 Dotični pojedinac ili tijelo ima pravo da traži da se oglasi u svoju odbranu. Ako je dotični pojedinac delegat u Skupštini ili član Izvršnog odbora, nema pravo glasa i tokom procesa glasanja mora napustiti prostoriju.
- 4 Ako se zahtjev za razrješenje podrži, Skupština ili Izvršni odbor donosi odluku tajnim glasanjem. Da bi se takav zahtjev usvojio, potrebna je većina od  $\frac{3}{4}$  važećih glasova prisutnih članova.
- 5 Pojedinac ili tijelo koji su razriješeni (privremeno) moraju se odmah osloboditi svojih dužnosti. Takav pojedinac ili tijelo zamjenjuju se u skladu sa Statutom.

## **IX PRAVNA TIJELA**

### **Član 41.**

- 1 Pravna tijela Saveza su:
  - a) Disciplinska komisija,
  - b) Apelaciona komisija.
  - c) Tužioci
- 2 Članovi pravnih tijela ne mogu istovremeno biti članovi Izvršnog odbora ni bilo koje stalne ili ad hok komisije.
- 3 Predsjednika, dopredsjednika, članove pravnih tijela i njihove zamjenike bira Skupština, u skladu sa odredbama ovog Statuta, na mandat u trajanju od 4 godine.
- 4 Prava i dužnosti svih pravnih tijela, funkcije predsjednika i dopredsjednika će biti utvrđene posebnim organizacionim propisima koje usvaja Izvršni odbor.
- 5 Nadležnost i način rada, kao i druge odredbe o radu pravnih tijela, bliže se regulišu poslovníkom o radu pojedinih pravnih tijela Saveza.

- 6 Predsjedavajući Disciplinske i Apelacione komisije moraju biti diplomirani pravnici.  
7 U slučaju spriječenosti, na sljedećoj redovnoj Skupštini Saveza bira se zamjena za  
preostalo trajanje mandata. U međuvremenu, na upražnjeno mjesto imenuje se  
zamjena od strane Izvršnog odbora Saveza.  
8 Ako pravovaljano pozvan član izostane sa sastanka bez opravdanog razloga ili ne  
glasa na dva uzastopna sastanka, Izvršni odbor može privremeno razriješiti tog člana  
s njegove funkcije. Nadalje, Izvršni odbor na narednoj Skupštini traži da se glasa o  
razrješenju tog člana. U slučaju potvrde razrješenja, delegati moraju provesti izbore  
kako bi isti bio zamijenjen za preostali dio mandata.  
9 U osnovi sastav pravnih tijela treba sačinjavati: predsjednik i dopredsjednik te dva  
člana uz dva zamjenska člana iz kantonalnih i županijskih saveza.

## **Disciplinska komisija**

### **Član 42.**

- 1 Disciplinska komisija sastoji se od četiri člana, uz dva zamjenska člana u cilju  
izbjegavanja sukoba interesa.  
2 Predsjednik i dopredsjednik moraju biti iz kantonalnih i županijskih saveza.  
3 Predsjednika, dopredsjednika i članove (uključujući i zamjenske) Komisije imenuje  
Skupština Saveza, na prijedlog kantonalnih/županijskih saveza.  
4 Kvorum je postignut kada su prisutna najmanje tri člana Komisije.  
5 Odluke se donose 2/3 većinom od ukupnog broja članova Komisije.  
6 U ponovljenoj sjednici, koja se mora održati u roku od osam dana, odluke se donose  
2/3 većinom prisutnih članova.  
7 U slučaju jednakog broja glasova, odlučuje glas predsjednika ili predsjedavajućeg.

## **Apelaciona komisija**

### **Član 43.**

- 1 Apelaciona komisija sastoji se od četiri člana, uz dva zamjenska člana u cilju  
izbjegavanja sukoba interesa.  
2 Predsjednik i dopredsjednik moraju biti iz kantonalnih i županijskih saveza.  
3 Predsjednika, dopredsjednika i članove (uključujući i zamjenske) Komisije imenuje  
Skupština Saveza, na prijedlog kantonalnih/županijskih saveza.  
4 Kvorum je postignut kada su prisutna najmanje tri člana Komisije.  
5 Odluke se donose 2/3 većinom glasova od ukupnog broja članova Komisije  
6 U ponovljenoj sjednici, koja se mora održati u roku od osam dana, odluke se donose  
dvotrećinskom većinom od ukupnog broja prisutnih članova.  
7 U slučaju jednakog broja glasova, odlučuje glas predsjednika ili predsjedavajućeg.  
8 Odluke Apelacione komisije su konačne.  
9 Apelaciona komisija rješava sve žalbe na odluke Disciplinske komisije, Komisije za  
takmičenje i prvostepenih takmičarskih i disciplinskih organa liga koji su u nadležnosti  
NS FBiH, prema odredbama ovog Statuta i odlukama Izvršnog odbora.

## **Tužioci**



#### **Član 44.**

- 1 NS FBiH ima dva tužioca iz kantonalnih i županijskih saveza, koji moraju biti diplomirani pravnici.
- 2 Tužilac zastupa interese NS FBiH u disciplinskim postupcima.
- 3 Predsjednik NS FBiH i predsjedavajući pravnih tijela mogu tražiti da tužilac NS FBiH provede istragu.
- 4 Tužilac ima pravo uložiti žalbu na odluku Disciplinske komisije i reagovati na odluku Apelacione komisije.
- 5 Bliže odredbe o pravima i obavezama tužilaca utvrđuju se Pravilnikom o radu tužilaca, koji donosi Skupština.

### **X KOMISIJE**

#### **Član 45.**

- 1 Stalne komisije su:
  - a) Financijska komisija
  - b) Komisija za takmičenje/natjecanje
  - c) Stručno trenersko-tehnička komisija
  - d) Komisija za sportsku medicinu
  - e) Komisija za sudije i suđenje
  - f) Komisija za omladinski nogomet
  - g) Komisija za ženski nogomet
  - h) Komisija za mali nogomet
  - i) Komisija za status igrača
  - j) Komisija za propise
  - k) Komisija za stadione i bezbjednost
  - l) Komisija za medije
- 2 Izvršni odbor može po potrebi osnivati nove stalne ili ad hok komisije radi rješavanja posebnih pitanja.
- 3 Svaka komisija sastoji se od četiri člana uključujući predsjednika i dopredsjednika.
- 4 Funkcije predsjednika i dopredsjednika komisije će biti utvrđene posebnim organizacionim pravilnikom.
- 5 Predsjednik i dopredsjednik moraju biti iz kantonalnih i županijskih saveza.
- 6 Kvorum je postignut kada su prisutna najmanje tri člana.
- 7 Komisije donose odluke 2/3 većinom ukupnog broja članova.
- 8 U ponovljenoj sjednici koja će se održati najkasnije u roku od osam dana, odluke se donose 2/3 većinom prisutnih članova.
- 9 U slučaju jednakog broja glasova, odlučuje glas predsjednika ili predsjedavajućeg.

#### **Struktura komisija**

#### **Član 46.**

- 1 Predsjednika, dopredsjednika i članove svake stalne komisije imenuje Izvršni odbor na mandat u trajanju od četiri godine, uz mogućnost ponovnog izbora.
- 2 Sastav članova stalnih komisija čine predsjednik, dopredsjednik i dva člana kantonalnih i županijskih saveza.
- 3 Odlukama Izvršnog odbora mogu se formirati i inokosni organi.

- 4 Izvršni odbor može donijeti odluku da poslove i zadatke iz nadležnosti takmičarskih organa obavljaju inokosni organi (povjerenik za natjecanje, povjerenik za suđenje, disciplinski sudac i dr.)

### **Sjednice, odluke i druge odredbe**

#### **Član 47.**

- 1 Predsjednik rukovodi radom Komisije. Nakon obaveznih konsultacija sa generalnim sekretarom, on određuje datume sjednica. Predsjednik je odgovoran da komisija obavlja svoje poslove i da o tome redovno informiše predsjednika i Izvršni odbor, putem blagovremenog dostavljanja zapisnika sa sjednica.
- 2 Prava, nadležnosti i način rada komisije utvrđuju se odgovarajućim pravilnicima i poslovnica o radu komisija.

### **XI SEKRETARIJAT (Stručna služba Saveza)**

#### **Član 48.**

Sekretarijat obavlja svakodnevne aktivnosti administrativno-finansijsko-takmičarskog karaktera svih oblika, kao i poslova za opsluživanje organa, pravnih tijela i komisija, organizuje svoju stručnu službu- Sekretarijat Saveza.

#### **Član 49.**

- 1 Bliže odredbe o organizaciji stručne službe- Sekretarijata Saveza, regulišu se Pravilnikom o radu i organizaciji stručne službe, sa sistematizacijom radnih mjesta i uslovima potrebnih za obavljanje traženih poslova i platama.
- 2 Pravilnik, u smislu prethodnog stava, usvaja Izvršni odbor Saveza, na prijedlog predsjednika i generalnog sekretara.

#### **Član 50.**

- Sekretarijat je odgovoran za administrativna pitanja, kao što su:
- a) provođenje odluka Izvršnog odbora, stalnih i ad hok komisija;
  - b) vođenje računovodstva Saveza;
  - c) pripremanje sjednica Skupštine, Izvršnog odbora, stalnih i ad hok komisija;
  - d) vođenje zapisnika na sjednicama Izvršnog odbora, stalnih i ad hok komisija;
  - e) kontakti sa javnošću;
  - f) pomoć i podrška članovima Saveza

### **Generalni sekretar**

#### **Član 51.**

- 1 Generalni sekretar je administrativni izvršni direktor Sekretarijata. Imenuje ga Izvršni odbor i zapošljava u Savez na osnovu ugovora o radu.
- 2 Bliže odredbe o nadležnostima, pravima, obavezama, uslovima za imenovanje i ostalim principima oko njegovog imenovanja i reizbora, utvrđuje Izvršni odbor Saveza svojom odlukom, na prijedlog predsjednika Saveza.
- 3 Prisustvuje sjednicama Skupštine, Izvršnog odbora, Komiteta za hitnost i drugih organa i tijela, učestvuje u raspravama u savjetodavnom svojstvu. U slučaju spriječenosti, može imenovati zamjenu.

- 4 Podnosi Izvršnom odboru izvještaj o poslovanju, šestomjesečnom i godišnjem finansijskom izvještaju Saveza.
- 5 Odgovoran je za obavljanje svih zadataka Sekretarijata, kao i za rukovođenje personalom.
- 6 Potpisuje odluke iz djelokruga rada Sekretarijata, s tim što ovlaštenje može prenijeti na drugu osobu.

## **XII RAČUNOVODSTVO**

### **Fiskalna godina, budžet**

#### **Član 52.**

- 1 Fiskalna godina Saveza počinje 1. januara/siječnja i završava 31. decembra/prosinca.
- 2 Izvršni odbor Saveza utvrđuje budžetske smjernice Saveza, finansijski plan prihoda i rashoda za tekuću godinu, koje razmatra i usvaja Skupština Saveza.
- 3 O vanrednim troškovima koji nisu predviđeni u budžetu odlučuje IO Saveza, preko dodatnog kreditiranja. O njima se raspravlja prilikom rebalansa budžeta Saveza.
- 4 Naredbodavac za izvršenje plana prihoda i rashoda utvrđenom odlukom o budžetu Saveza za tekuću godinu je generalni sekretar Saveza.

### **Revizija računovodstva**

#### **Član 53.**

- 1 Sektor računovodstva i knjigovodstva obavezan je voditi računovodstvene knjige u skladu sa Zakonom, kao i podnositi finansijski godišnji izvještaj, koje razmatra i usvaja Skupština Saveza.
- 2 Skupština Saveza bira neovisnu revizorsku kompaniju, kao revizorsko tijelo, sa kojom se zaključuje ugovor na godinu dana. Moguć je ponovni izbor.
- 3 Revizorsko tijelo vrši reviziju obračuna i podnosi pismeni izvještaj Skupštini Saveza na razmatranje i usvajanje.

## **XIII FINANSIRANJE SAVEZA**

#### **Član 54.**

- 1 Savez se finansira iz sljedećih izvora:
  - a) kotizacije, članarine i takse članova saveza, klubova, sudija, trenera i ostalih službenih lica
  - b) prihod od izrečenih kazni
  - c) ostali prihodi.
- 2 Sredstva iz prihoda Saveza mogu se koristiti isključivo za razvoj nogometa, a u skladu sa ciljevima i zadacima Saveza.

#### **Član 55.**

Savez je obavezan da organizuje, vodi knjigovodstvo, finansijske i komercijalne poslove u skladu sa računovodstvenim i finansijskim propisima FBiH i BiH.

## **XIV TV I MARKETINŠKA PRAVA**

### **Televizijski i radio prijenos**

#### **Član 56.**

- 1 Za utakmice koje su u njegovoj nadležnosti, Savez je nosilac ekskluzivnih prava za televizijski i radio prijenos, kao i za bilo koje drugo korištenje i emitiranje putem slike ili zvuka, direktno ili snimkom, u cijelosti ili u dijelovima, s tim da klubovi imaju pravo na dio prihoda koji se odnose na domaća klupska takmičenja.
- 2 Klubovi su nosioci prava iz stava 1. ovog člana za turnire čiji su organizatori klubovi.
- 3 Izvršni odbor donosi pripadajuće odredbe o primjeni ovog člana.

## **XV TAKMIČENJA/NATJECANJA**

### **Takmičenja/Natjecanja na nivou FBiH**

#### **Član 57.**

- 1 Savez je odgovoran za organizaciju takmičenja na nivou Federacije BiH koja mu je u nadležnost prenio NS/FS BiH. Sve njegove odluke po tom pitanju su konačne.
- 2 Savez može delegirati dio svojih odgovornosti na kantonalne/županijske saveze.

#### **Član 58.**

Takmičenja/natjecanja Saveza su sljedeća: prvenstvo u muškom i ženskom, velikom i malom nogometu, prvenstvo mlađih kategorija, kao i kup natjecanje koje mu je u nadležnost prenio NS/FS BiH.

#### **Član 59.**

- 1 Svako takmičenje ili turnir organizovan u Federaciji BiH na međunarodnom, državnom, međukantonalnom/međužupanijskom nivou podliježe odobrenju od strane NS FBiH i NS/FS BiH.
- 2 Svako takmičenje ili turnir u F BiH organizovan na nivou jednog kantona/županije podliježe odobrenju od strane dotičnog kantonalnog/županijskog saveza.

### **Pravila takmičenja**

#### **Član 60.**

- 1 Izvršni odbor donosi pravila: propozicije i odgovarajuće akte za takmičenja na nivou Federacije BiH i za druga takmičenja koja su u njegovoj nadležnosti.
- 2 Uslov za učestvovanje na takmičenju je da klub prihvata Statut Saveza, pravilnike NS/FS BiH i NS FBiH i odluke donesene u skladu sa njima.

### **Zabrana udruživanja ili saveza**

#### **Član 61.**

- 1 Svaka liga ili bilo koja druga grupa klubova udruženih u NS FBiH mora biti podređena i priznata od strane NS FBiH.

- 2 Statuti i pravilnici takvih udruženja prethodno moraju dobiti saglasnost Izvršnog odbora Saveza.
- 4 Kantonalni/županijski ili općinski savezi i njihovi klubovi ne mogu formirati nikakve kombinacije ili saveze bez prethodnog odobrenja izvršnog odbora Saveza.
- 5 Bez izričitog odobrenja, klubovi koji su članovi Saveza ne mogu igrati protiv klubova koji nisu učlanjeni u Savez.

## **XVI DISCIPLINSKA PRAVILA**

### **Član 62.**

Disciplinske mjere mogu biti izrečene za nesportsko ponašanje, povredu Pravila nogometne igre i prekršaj Statuta Saveza, pravilnika ili odluka donesenih u skladu sa njima.

### **Disciplinske mjere**

#### **Član 63.**

- 1 Članovima Saveza mogu biti izrečene disciplinske mjere, u skladu sa Disciplinskim pravilnikom NS/FS BiH.
- 2 Vrste disciplinskih mjera su:
- I Za pojedince:
- a) opomena;
  - b) novčana kazna;
  - c) zabrana igranja određenog broja utakmica ili za određeni period
  - d) zabrana obavljanja funkcije za određeni period
  - e) isključenje iz kluba;
  - f) isključenje iz nogometne organizacije.
- II Za klubove i asocijacije:
- a) opomena;
  - b) novčana kazna;
  - c) zabrana odigravanja utakmica u inostranstvu;
  - d) zabrana odigravanja utakmica na određeno vrijeme na određenom igralištu ili svim igralištima određenog regiona;
  - e) zabrana igranja sa gledateljima;
  - f) oduzimanje bodova;
  - g) negativni bodovi;
  - h) vraćanje u niži stepen takmičenja;
  - i) diskvalifikacija iz takmičenja.

#### **Član 64.**

- 1 Pravna tijela ovlaštena su za izricanje disciplinskih mjera
- 2 Disciplinske mjere mogu biti izrečene istovremeno vezano za pojedini slučaj.

## **XVII S P O R O V I**

### **Nezavisni i nepristrasni arbitražni tribunal – CAS**

#### **Član 65.**

- 1 NS FBiH, njegovi članovi, klubovi, igrači, službena lica i drugi učesnici u organiziranom nogometu mogu u konačnoj instanci svaki spor domaćeg karaktera koji proizilazi ili je vezan za NS FBiH, Statut, propise, direktive i odluke donesene u vezi s njim, kao i sporove vezane za bilo koji ugovor, podnijeti na isključivu nadležnost CAS-a u Lozani, u Švicarskoj. Izvršni odbor može putem NS/FS BiH uspostaviti odgovarajući dogovor sa CAS-om kojim se određuje postupanje u slučajevima NS FBiH kao članice NS/FS BiH.
- 2 CAS ostaje priznati arbitražni tribunal NS/FS BiH sve dok sportska organizacija ne uspostavi, u skladu sa zakonodavstvom BiH, odgovarajući arbitražni tribunal za teritoriju Bosne i Hercegovine, koja zadovoljava minimalne zahtjeve FIFA-e i UEFA-e.
- 3 CAS donosi konačna rješenja u sporovima, uz isključenje bilo kojeg redovnog suda, osim ako to nije eksplicitno zabranjeno važećim zakonima Bosne i Hercegovine.
- 4 U slučajevima kada je odluka statutarnog tijela NS FBiH postala konačna i nema drugih dostupnih pravnih lijekova, strana koja ima pravnog interesa može žalbu na takvu odluku podnijeti CAS-u, uz isključenje žalbe pred bilo kojim redovnim sudom.
- 5 Ako se strane ne dogovore drugačije, pred CAS-om važe švicarski zakoni.
- 6 Međutim, CAS neće razmatrati žalbe po ovim pitanjima:
  - a) žalbe u vezi sa kršenjem Pravila igre,
  - b) žalbe na suspenzije do četiri utakmice ili do tri mjeseca,
  - c) žalbe na odluke koje donose nezavisni i propisno formirani arbitražni tribunal saveza ili konfederacije,
  - d) odluke tijela za licenciranje klubova.
- 7 Što se tiče FIFA-inih odluka u međunarodnim stvarima, primjenjuju se relevantne odredbe FIFA-inog Statuta.

#### **Nadležnost**

#### **Član 66.**

- 1 NS FBiH, njegovi članovi, igrači i službenici, klubovi, agenti za utakmice i igrače, službena lica Saveza svoje sporove neće podnositi redovnim sudovima, osim ako to nije konkretno predviđeno ovim Statutom i FIFA-inim propisima. Svako neslaganje će se podnositi na nadležnost FIFA-e, UEFA-e, NS/FS BiH ili NS FBiH.
- 2 NS FBiH je nadležan u internim sporovima, tj. sporovima između stranaka koje pripadaju NS FBiH. NS/FS BiH je nadležan u međuentitetskim sporovima, tj. sporovima između stranaka koje pripadaju različitim entitetima. FIFA je nadležna u međunarodnim sporovima, tj. sporovima između stranaka koje pripadaju različitim savezima ili konfederacijama.

## **XVIII ZAVRŠNE ODREDBE**

### **Važeći zakoni i teritorijalna nadležnost**

#### **Član 67.**

- 1 U svim slučajevima kada je to potrebno, pored ovog Statuta, Statuta NS/FS BiH i pravilnika i poslovnika organa Saveza i NS/FS BiH, kao i odluka nadležnih organa saveza, primjenjivat će se prvo odgovarajući Statuti FIFA-e i UEFA-e, propisi i direktive, kao supsidijarni propis, prije primjene zakonodavstva Federacije Bosne i Hercegovine i Bosne i Hercegovine.

- 2 Postupci koji se provode pred statutarnim tijelima NS FBiH, vode se u skladu sa relevantnim odredbama propisa NS FBiH. Ako ti propisi ne daju odgovor, prvo se primjenjuju odgovarajući statuti FIFA-e i UEFA-e, propisi i direktive, kao supsidijarni propis, prije primjene Zakona o upravnom postupku FBiH.

### **Materija koja nije obuhvaćena Statutom**

#### **Član 68.**

Izvršni odbor ovlašten je da odlučuje o svim pitanjima koja nisu obuhvaćena ovim Statutom ili u slučajevima više sile, a u skladu sa pravom i pravdom.

### **Raspuštanje Saveza**

#### **Član 69.**

- 1 U slučaju da nastupe okolnosti na osnovu kojih Savez prestaje da postoji, za odluku o raspuštanju Saveza potrebna je  $\frac{3}{4}$  većina članova Skupštine Saveza.
- 2 U slučaju raspuštanja Saveza nadzor nad imovinom Saveza će biti povjerena NS/FS BiH do ponovnog formiranja Saveza. Članovi Saveza ne mogu imovinu podijeliti između sebe.

### **Primjena**

#### **Član 70.**

Ovaj prečišćeni tekst Statuta usvojen je na sjednici Skupštine Saveza, održanoj 30.11.2011. godine i primjenjuje se osam dana od dana kada ga usvoji Skupština NS FBiH.

#### **Član 71.**

Stupanjem na snagu ovog Statuta prestaje da važi Statut NS FBiH, usvojen na sjednici Skupštine NS FBiH 19.03.2008. godine.

### **Obaveza prilagođavanja sadašnjih statuta**

#### **Član 72.**

- 1 Obavezuju se kantonalni/županijski savezi da svoje statute usklade sa ovim Statutom najkasnije do 26.01.2012. nakon usvajanja prečišćenog teksta ovog Statuta, a druge akte u roku od šest mjeseci.
- 2 Svi organi Saveza moraju svoje akte, pravilnike i poslovnike uskladiti sa ovim Statutom u roku od šest mjeseci od dana usvajanja prečišćenog teksta ovog Statuta.
- 3 Do usaglašavanja sa ovim Statutom primjenjivat će se odredbe postojećih pravilnika i poslovnika i ostalih akata Saveza koji nisu u suprotnosti sa ovim Statutom.
- 4 Tekst Statuta će se štampati na službenim jezicima Saveza.

GENERALNI SEKRETAR

Eldin Baković sr.

PREDSJEDNIK

Iljo Dominković vr.

